

Na osnovu člana 15. Zakona o principima lokalne samouprave u Federaciji Bosne i Hercegovine („Službene novine Federacije BiH“, broj: 49/06 i 51/09), člana 71, 124. i 125. Statuta Općine Vogošća („Službene novine Kantona Sarajevo“, broj: 27/14 - Prečišćeni tekst i broj: 14/15, 9/20 i 23/24), člana 171. Zakona o socijalnoj zaštiti, zaštiti civilnih žrtava rata, zaštiti porodice sa djecom („Službene novine Kantona Sarajevo“ broj: 38/14 – Prečišćeni tekst, 38/16, 44/17, 28/18, 52/21, 40/22 i 13/25), Odluke o izvršavanju Budžeta Općine Vogošća za 2025. godinu („Službene novine Kantona Sarajevo“, broj: 1/25), Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije BiH“, broj: 37/24) i Odluke Općinskog načelnika o načinu primjene smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine, broj: 02-02-575/25 od 15.04.2025. godine, Općinski načelnik Općine Vogošća donosi:

P R A V I L N I K

O KRITERIJIMA I RASPODJELI NOVČANIH SREDSTAVA ZA DODJELU JEDNOKRATNE NOVČANE POMOĆI ZA SUFINANSIRANJE LIJEČENJA OSOBA OBOLJELIH OD RIJETKIH I TEŠKIH BOLESTI

Član 1. (Predmet pravilnika)

Ovim Pravilnikom utvrđuju se kriteriji i način dodjele jednokratne novčane pomoći za sufinansiranje liječenja osoba oboljelih od rijetkih i teških bolesti, a čije je prebivalište na području općine Vogošća.

Član 2. (Cilj)

Cilj dodjele jednokratne novčane pomoći u smislu ovog Pravilnika, predstavlja pomoć pri realizaciji troškova liječenja oboljelih od rijetkih i teških bolesti, a koje iziskuje veća novčana sredstva.

Član 3. (Sredstva)

(1) Sredstva za dodjelu jednokratne novčane pomoći za sufinansiranje liječenja osoba oboljelih od rijetkih i teških bolesti utvrđuju se u Budžetu Općine Vogošća (u daljem tekstu: Budžet Općine) za svaku kalendarsku godinu.

(2) Raspodjela novčanih sredstava za ove namjene vršit će se u skladu sa raspoloživim sredstvima u Budžetu Općine za ove namjene.

Član 4. (Uslovi)

Pravo na jednokratnu novčanu pomoć za sufinansiranje troškova liječenja u smislu Pravilnika, mogu ostvariti osobe oboljele od rijetkih i teških bolesti uz ispunjavanje sljedećih uslova:

- (1) da je podnosilac zahtjeva državljanin Bosne i Hercegovine;
- (2) da podnosilac zahtjeva ima prijavljeno prebivalište na području općine Vogošća najmanje 1 (jednu) godinu neposredno prije podnošenja prijave na javni poziv iz člana 5. ovog Pravilnika;
- (3) dokaz da je podnosilac zahtjeva obolio od rijetke i teške bolesti (nalaz i mišljenje izdato od Instituta za medicinsko vještačenje sa izjašnjenjem da se radi o rijetkoj i teškoj bolesti);
- (4) dokaz o potrebi liječenja osobe u BiH ili van teritorija BiH, koji zahtjeva veća novčana sredstva (predračun za troškove liječenja);
- (5) da ukupna mjesečna primanja porodičnog domaćinstva ne prelaze iznos jedne prosječne plaće ostvarene u Federaciji BiH prema posljednjim statističkim pokazateljima, osim u izuzetnim i opravdanim okolnostima koje će se cijeliti u svakom konkretnom slučaju.

Član 5.
(Javni poziv i potrebna dokumentacija)

- (1) Sredstva sa budžetske pozicije predviđena za ove namjene dodjeljuju se na osnovu javnog poziva koji se objavljuje na web stranici Općine i ostaje otvoren do kraja tekuće kalendarske godine, odnosno do utroška planiranih budžetskih sredstava.
- (2) Jednokratna novčana pomoć utvrđena ovim Pravilnikom dodijeljivat će se na osnovu podnesenih zahtjeva, a u skladu sa objavljenim javnim pozivom.
- (3) Zahtjevi za ostvarivanje prava podnose se Službi za boračko-invalidsku i socijalnu zaštitu.
- (4) Zahtjevi će se rješavati po redoslijedu podnošenja.
- (5) Dokumentacija koju je potrebno priložiti uz zahtjeve po objavljenom javnom pozivu biti će navedena u posebnom obrascu koji će biti sastavni dio javnog poziva.

Član 6.
(Visina jednokratne novčane pomoći)

Korisnici prava po ovom Pravilniku, imaju pravo na jednokratnu novčanu pomoć u sljedećem iznosu:

- (1) jednokratna novčana pomoć za sufinansiranje liječenja osoba oboljelih od rijetkih i teških bolesti dodjeljivati će u visini od 1000,00 (jednihiljada) KM u skladu sa obezbijeđenim finansijskim sredstvima za tekuću godinu u Budžetu Općine Vogošća.

Član 7.
(Postupak za ostvarivanje prava)

- (1) Postupak za dodjelu jednokratne novčane pomoći za sufinansiranje liječenja osoba oboljelih od rijetkih i teških bolesti provodi Komisija imenovana od strane Općinskog načelnika.
- (2) Općinski načelnik imenuje Komisiju za pregled prispjelih zahtjeva po osnovu javnog poziva iz člana 5. ovog Pravilnika.
- (3) Komisija će u svakom konkretnom slučaju, iznos odobrenih novčanih sredstava utvrditi na osnovu priložene dokumentacije.
- (4) Nakon što Komisija utvrdi da su ispunjeni uslovi propisani ovim Pravilnikom, Općinski načelnik putem nadležne Službe donosi Rješenje o ostvarivanju prava.
- (5) Zahtjevi koji ne ispunjavaju propisane uslove za dodjelu novčanih sredstava, kao i zahtjeve podnesene nakon utroška sredstava predviđenih za jednokratnu novčanu pomoć za sufinansiranje osoba oboljelih od rijetkih i teških bolesti, odbijaju se Zaključkom Općinskog načelnika putem nadležne Službe, a na prijedlog Komisije.
- (6) Protiv Zaključka iz stava 4. i 5. ovog člana može se izjaviti žalba Drugostepenoj stručnoj komisiji Općinskog vijeća u roku od 15 dana od dana prijema Zaključka.
- (7) Podneseni zahtjev važi samo za kalendarsku godinu u kojoj je zahtjev podnešen.

Član 8.
(Obrasci prijave po Javnom pozivu)

Nadležna služba će s ciljem pomoći korisnicima po ovom Pravilniku izraditi obrazac zahtjeva na javni poziv iz člana 5. ovog Pravilnika sa popisom i nazivom potrebne dokumentacije, a koji će činiti sastavni dio Javnog poziva.

Član 9.
(Isplata jednokratne novčane pomoći)

Isplata jednokratne novčane pomoći za sufinansiranje liječenja osoba oboljelih od rijetkih i teških bolesti dodjeljivat će se isplatom na transakcijski račun podnosioca zahtjeva putem Službe za budžet i finansije.


Član 10.
(Stupanje na snagu Pravilnika)

Ovaj Pravilnik stupa na snagu narednog dana od dana objave na Oglasnoj ploči i web stranici Općine Vogošća.

Član 11.
(Prestanak)

Stupanjem na snagu ovog Pravilnika, prestaje da važi Pravilnik o raspodjeli novčanih sredstava za sufinansiranje liječenja osoba oboljelih od rijetkih ili teških bolesti, broj: 09/1-35-189/19 od 28.01.2019. godine.

Broj: 09-31-1242/25
Vogošća, 13.06.2025.godine


OPĆINSKI NAČELNIK

Migdad Hasanović